

## ՀՀ ֆինանսների նախարարություն

### Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 52/4

4 դեկտեմբերի 2015 թ.

Քննարկվեց ՀՀ գյուղատնտեսության նախարարի գանգատը ՀՀ ՖՆ իրավաբանական վարչության պետի 21.08.2015 թ-ի թիվ 79 որոշման դեմ:

#### ՀՀ գյուղատնտեսության նախարարի գանգատում բերված փաստարկները.

Ուսումնասիրելով ՀՀ ֆինանսների նախարարության իրավաբանական վարչության պետի 2015 թ-ի օգոստոսի 21-ի թիվ 79 որոշումը (այսուհետ՝ Որոշում)՝ ՀՀ գյուղատնտեսության նախարարությունը հայտնում է հետևյալը.

ՀՀ ԿԱ հարկային պետական ծառայության կողմից կատարվել է ՀՀ գյուղատնտեսության նախարարության՝ բյուջեի հետ փոխհարաբերությունների ճշտության և հարկային մարմնի կողմից վերահսկվող օրենսդրության առանձին պահանջների կատարման ճշտության ստուգում պետական տուրքի գծով՝ 01.01.2005-18.02.2009թ.թ. ժամանակահատվածի համար, ինչի արդյունքում 18.02.2009թ. կազմվել է թիվ 1040552 ստուգման ակտը (այսուհետ՝ Ակտ), համաձայն որի՝ առաջադրվել է ՀՀ պետական բյուջե լրացուցիչ վճարման ենթակա գումար՝ ընդամենը 1.053.750 ՀՀ դրամ, որից՝ 528.500 դրամը՝ որպես պետական տուրք և 525.250 ՀՀ դրամը՝ որպես հաշվարկված տույժ:

Որոշման համաձայն՝ 18.08.2015թ. դրությամբ ՀՀ գյուղատնտեսության նախարարության աշխատակազմի չկատարված հարկային պարտավորությունները կազմում են 6.865.712 ՀՀ դրամ, ինչի վերաբերյալ ներկայացնում ենք հետևյալ դիտարկումները.

1. «Պետական տուրքի մասին» ՀՀ օրենքի 35-րդ հոդվածի 7-րդ մասի համաձայն՝ նույն հոդվածով նախատեսված տույժը կիրառվում է ժամանակին չվճարված (չգանձված) պետական տուրքի գումարի նկատմամբ՝ դրա վճարման ժամկետից անցած ամբողջ ժամանակաշրջանի համար, բայց ոչ ավելի, քան 365 օրվա համար: Սակայն Որոշման ընդունման համար հիմք հանդիսացած Ակտը կազմվել է 18.02.2009 թ-ին, իսկ տույժերը, համաձայն Որոշման, հաշվարկվել են 18.08.2015թ. դրությամբ:

2. Ակտով առաջադրված գումարի՝ ՀՀ պետական բյուջե վճարումն ապահովելու համար, ՀՀ գյուղատնտեսության նախարարության ձեռնարկած միջոցառումների արդյունքում լիցենզիա ստացած համապատասխան անձինք ամբողջությամբ կատարել են անհրաժեշտ վճարումները՝ գումարները փոխանցելով ՀՀ պետական բյուջեի պետական տուրքի 900005162822 հաշվեհամարին, և դրանք հավաստող անդորրագրերն, ըստ ՀՀ գյուղատնտեսության նախարարության տվյալների, առկա են հարկային մարմնում:

3. Որոշման վերնագրից երևում է, որ այն հարկ վճարողից ժամանակին չվճարված հարկային պարտավորությունների գծով վճարման ենթակա գումարը գանձելու մասին է: Որոշումն ընդունվել է «Հարկերի մասին» և «Վարչարարության հիմունքների և վարչական վարույթի մասին» ՀՀ օրենքների հիման վրա: Սակայն Որոշման պատճառաբանական՝ «Պարզեցի» մասից երևում է, որ Որոշման ընդունման համար հիմք է հանդիսացել ՀՀ գյուղատնտեսության նախարարության աշխատակազմի կողմից ժամանակին չվճարված պետական տուրքի գծով վճարման ենթակա գումարի չվճարումը: Ավելին, Որոշման ընդունման համար հիմք հանդիսացած Ակտը կայացվել է **պետական տուրքի** գծով բյուջեի հետ փոխհարաբերությունների ճշտության և հարկային մարմնի կողմից վերահսկվող օրենսդրության առանձին պահանջների կատարման ճշտության ստուգման արդյունքում: Հաշվի առնելով, որ թե՛ Որոշումը և թե՛ Ակտը բովանդակային առումով վերաբերում են պետական տուրքի և դրա չվճարման հետ կապված հարաբերություններին, գտնում ենք, որ

Որոշման հետ կապված հարաբերություններն ենթակա են կարգավորման «Վարչարարության հիմունքների և վարչական վարույթի մասին» ՀՀ օրենքով (այսուհետ՝ Օրենք) և «Պետական տուրքի մասին» ՀՀ օրենքով:

Ավելին, «Հարկերի մասին» ՀՀ օրենքի 3-րդ հոդվածի համաձայն՝ հարկը պետական և հասարակական կարիքների բավարարման նպատակով համապարտադիր և անհատույց վճար է, որը գանձվում է ֆիզիկական և իրավաբանական անձանցից, հիմնարկներից, տեղական ինքնակառավարման մարմիններից՝ հարկային օրենսդրությամբ նախատեսված կարգով, չափերով և սահմանված ժամկետներում: Իսկ նույն օրենքի 12-րդ հոդվածով սահմանվում է ՀՀ-ում գործող հարկատեսակների ցանկը, որի մեջ ներառված չէ պետական տուրքը, հետևաբար, պետական տուրքը, ՀՀ օրենսդրության համաձայն, հարկատեսակ չի համարվում:

Բացի այդ, «Հարկերի մասին» ՀՀ օրենքի 16-րդ հոդվածի 1-ին մասի համաձայն՝ **հարկային պարտավորությունը** ներառում է հարկերի (այդ թվում՝ թաքցված կամ պակաս ցույց տրված հարկվող օբյեկտի համար նախատեսված), ինչպես նաև հարկային օրենսդրությունը և ՀՀ-ում հարկային հարաբերությունները կարգավորող մյուս իրավական ակտերը խախտելու համար հաշվարկված՝ հարկային օրենսդրությամբ սահմանված տույժերի և տուգանքների գումարների վճարումը:

Ելնելով վերոգրյալից և հաշվի առնելով, որ պետական տուրքը չի համարվում հարկատեսակ՝ պետական տուրքի չվճարման արդյունքում ձևավորված պարտավորությունը չի կարող համարվել հարկային պարտավորություն:

4. Հարկ է նշել, որ Որոշումը ստանալուց հետո ՀՀ գյուղատնտեսության նախարարությունը բանավոր քննարկումների միջոցով փորձել է լուծում տալ խնդրին: Այնուհետև, ՀՀ գյուղատնտեսության նախարարության աշխատակազմի ղեկավարը լիազորված անձի միջոցով 03.09.2015թ. թիվ 19807 գրությամբ դիմում է ներկայացրել ՀՀ ֆինանսների նախարարության Կենտրոնի հարկային տեսչություն՝ Օրենքի 39-րդ հոդվածին համապատասխան վարչական վարույթի նյութերին ծանոթանալու և անհրաժեշտ քաղվածքներ կատարելու խնդրանքով:

Ներկայացված դիմումը հարկային մարմնի 17.09.2015թ. թիվ 7112/1 գրությամբ մերժվել է՝ պատճառաբանությամբ, որ պահանջված տեղեկությունները «Հարկային ծառայության մասին» ՀՀ օրենքի 4-րդ հոդվածի համաձայն համարվում են հարկային գաղտնիք և ենթակա չեն տրամադրման:

Նշված մերժմամբ խախտվել է Օրենքի 39-րդ հոդվածը, որի 1-ին մասի համաձայն՝ վարչական վարույթի մասնակիցները, վարչական մարմնի գործունեության հրապարակայնությունը և վարչական վարույթի իրականացման ժամանակ այդ մարմնի անաչառությունն ապահովելու նպատակով, իրավունք ունեն վարույթն իրականացնող մարմնում ծանոթանալու վարչական վարույթի նյութերին՝ հնարավորություն չտալով վարչական վարույթի մասնակցին Ակտի և Որոշման միջև առկա անճշտությունների վերաբերյալ պարզաբանումներ ստանալու և տրամադրելու հնարավորությունից: Այս դեպքում Օրենքի 43-րդ հոդվածի 1-ին մասի 2-րդ կետին համապատասխան ապացուցման պարտականությունը կկրի վարչական մարմինը:

5. Հայտնում ենք նաև, որ Որոշումն, ըստ էության, վարչական ակտ է: Իսկ վարչական ակտի ընդունման հետ կապված հարաբերությունները կարգավորված են Օրենքով: Քննարկվող դեպքում խախտվել են Օրենքի 37-րդ հոդվածի 1-ին մասի, 38-րդ հոդվածի 1-ին մասի դրույթները՝ վարչական մարմնի հանդիսացող ՀՀ ֆինանսների նախարարության իրավաբանական վարչության կողմից որևէ քննարկում չի կազմակերպվել և ՀՀ գյուղատնտեսության նախարարությունը զրկված է եղել իր դիրքորոշումը ներկայացնել վարչական վարույթում քննարկվող փաստական հանգամանքների վերաբերյալ:

Ընդհանուր առմամբ, նշված վարչական վարույթով խախտվել են Օրենքի մի շարք հոդվածներ՝ 37-րդ, 38-րդ, 39-րդ, 43-րդ, 53-րդ, 54-րդ, 55-րդ հոդվածները, 58-րդ հոդվածի 1-ին մասը և այլն:



6. Միաժամանակ հայտնում ենք, որ «Պետական տուրքի մասին» ՀՀ օրենքի 34-րդ հոդվածի 2-րդ մասի համաձայն՝ պետական տուրքը ճիշտ հաշվարկելու, ժամանակին գանձելու պատասխանատվությունը դրվում է **համապատասխան ծառայություններ կամ գործողություններ իրականացնող պաշտոնատար անձանց վրա**, իսկ գումարները կանխիկ գանձված (ստացված) լինելու դեպքում՝ դրանք ժամանակին բյուջե փոխանցելու պատասխանատվությունը դրվում է պետական տուրք գանձող մարմնի պատասխանատու պաշտոնատար անձի վրա: Իսկ նշված օրենքի 35-րդ հոդվածի 1-ին մասի համաձայն՝ պետական տուրք գանձող **պաշտոնատար անձանց կողմից** իրենց վրա դրված պարտականությունները ոչ պատշաճ կատարելու հետևանքով սահմանված ժամկետներում բյուջե չգանձված պետական տուրքի գումարները ենթակա են նրանցից բռնագանձման պետական բյուջե՝ ժամկետանց յուրաքանչյուր օրվա համար 0.15 տոկոսի չափով հաշվարկված տույժի հետ: Մինչդեռ, Որոշման եզրափակիչ մասում նշված է, որ 6.865712 ՀՀ դրամի պարտավորությունը դրվել է «ՀՀ գյուղատնտեսության նախարարության աշխատակազմի» վրա:

7. Համաձայն Օրենքի 53-րդ հոդվածի 1-ին մասի՝ վարչական ակտն արտաքին ներգործություն ունեցող այն որոշումը, կարգադրությունը, հրամանը կամ այլ անհատական իրավական ակտն է, որը **վարչական մարմինն** ընդունել է հանրային իրավունքի բնագավառում կոնկրետ գործի կարգավորման նպատակով, և ուղղված է անձանց համար իրավունքներ և պարտականություններ սահմանելուն, փոփոխելուն, վերացնելուն կամ ճանաչելուն:

Իսկ Օրենքի 3-րդ հոդվածի 1-ին մասի 1-ին կետի ա) ենթակետին համապատասխան՝ վարչական մարմիններ են հանդիսանում ՀՀ գործադիր իշխանության հանրապետական և տարածքային կառավարման, ինչպես նաև տեղական ինքնակառավարման մարմինները, մասնավորապես՝ ՀՀ գործադիր իշխանության հանրապետական մարմիններ՝ **ՀՀ նախարարություններ**, «Տեսչական մարմինների մասին» ՀՀ օրենքով նախատեսված բողոքարկման հանձնաժողով և Հանրապետության ողջ տարածքում վարչարարություն իրականացնող պետական այլ մարմիններ: Մինչդեռ 27.08.2015թ. ՀՀ գյուղատնտեսության նախարարություն ստացված Որոշումն ընդունել, ստորագրել և պաշտոնապես կնքել է ոչ թե վարչական մարմին հանդիսացող ՀՀ ֆինանսների նախարարությունը, այլ վարչական մարմնի իրավաբանական վարչության պետը, այսինքն՝ վարչական մարմնի ստորաբաժանման ղեկավարը:

Ավելին, Օրենքի 54-րդ հոդվածի 1-ին մասի համաձայն՝ վարչական ակտը, որպես կանոն, ընդունվում է գրավոր՝ որոշման, հրամանի, կարգադրության կամ օրենքով նախատեսված այլ ձևով: Իսկ Օրենքի 55-րդ հոդվածի 1-ին և 4-րդ մասերի համաձայն՝ գրավոր վարչական ակտն իր բովանդակությամբ պետք է համապատասխանի դրա ընդունման համար օրենքով սահմանված պահանջներին, նշում պարունակի այն բոլոր էական փաստական և իրավաբանական հանգամանքների վերաբերյալ, որոնք վարչական մարմնին հիմք են տվել ընդունելու համապատասխան որոշում, պետք է կազմված լինի սահմանված ձևի և նմուշի թղթի վրա և պետք է պարունակի՝ վարույթն իրականացրած **վարչական մարմնի** լրիվ անվանումը, ակտով լուծվող հարցի նկարագրությունը (նկարագրական մաս) ակտի ընդունման հիմնավորումը (պատճառաբանական մաս), ակտն ընդունած վարչական մարմնի **պաշտոնական կնիքը** և այլն: Որոշումը կնքվել է ՀՀ ֆինանսների նախարարության աշխատակազմի իրավաբանական վարչության կնիքով, որը, մեր կարծիքով, չի համարվում վարչական մարմնի պաշտոնական կնիք:

Ելնելով վերոգրյալից և ղեկավարվելով Օրենքի 62-րդ հոդվածի դրույթներով Որոշումն առ ոչինչ է: Ուստի առաջարկում ենք ՀՀ ֆինանսների նախարարությանը՝ հաստատելու Որոշման առ ոչինչ լինելը:

Միաժամանակ հայտնում ենք, որ ՀՀ կառավարության 2001 թ-ի սեպտեմբերի 24-ի «Լիցենզավորման մասին» ՀՀ օրենքի կիրարկումն ապահովելու մասին» թիվ 895 որոշման 2-



որդ կետով և 2011 թ-ի հունվարի 1-ից ուժի մեջ մտած ««Լիցենզավորման մասին» ՀՀ օրենքում փոփոխություններ և լրացումներ կատարելու մասին» ՀՀ 2010 թ-ի դեկտեմբերի 8-ի ՀՕ-227-Ն օրենքով «Լիցենզավորման մասին» ՀՀ օրենքում կատարված փոփոխությամբ պայմանավորված վարչական վարույթին առնչվող լիցենզիաների տրամադրումը վերապահվել է ՀՀ ֆինանսների նախարարությանը: Նշված օրենքի հիման վրա 2011 թ-ի սկզբին համապատասխան լիցենզավորման գործերը հանձնվել են ՀՀ ֆինանսների նախարարությանը, իսկ հանձնման-ընդունման գործընթացում անավարտ պարտավորությունների, իսկ ավելի ստույգ՝ հարկ վճարողից ժամանակին չվճարված հարկային պարտավորությունների գծով վճարման ենթակա գումարի վերաբերյալ որևէ փաստ չի արձանագրվել:

**ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.**

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննարկելով «Հայաստանի Հանրապետության գյուղատնտեսության նախարարության աշխատակազմ»-ի վերաբերյալ վարչական վարույթի նյութերը պարզել է, որ 18.08.2015 թ-ի դրությամբ «Հայաստանի Հանրապետության գյուղատնտեսության նախարարության աշխատակազմ»-ի չկատարված հարկային պարտավորությունները կազմում են 6.865.712 դրամ: Նշված պարտավորությունը պետական տուրքի գծով է, որն առաջացել է 18.02.2009 թ-ի թիվ 1040552 ստուգման ակտով:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ՖՆ իրավաբանական վարչության պետի կողմից 21.08.2015 թ-ին ընդունվել է թիվ 79 որոշումը (այսուհետ նաև Որոշում) «Հայաստանի Հանրապետության գյուղատնտեսության նախարարության աշխատակազմ»-ից 6.865.712 դրամ պարտավորության գումար գանձելու մասին:

Քննարկման ընթացքում նշվեց, որ սույն գործի վերաբերյալ իրավաչափ որոշում կայացվելու նպատակով ՀՀ ՖՆ Կենտրոնի ՀՏ և «Հայաստանի Հանրապետության գյուղատնտեսության նախարարության աշխատակազմ»-ի համապատասխան պաշտոնատար անձանձ առաջարկվել է համատեղ ուսումնասիրել ՀՀ ՖՆ իրավաբանական վարչության պետի 21.08.2015 թ-ի թիվ 79 որոշմամբ պետական տուրքի գծով գանձման առաջադրված պարտավորություններին վերաբերող հարցերը:

Համատեղ իրականացված ուսումնասիրության արդյունքում պարզվել է հետևյալը.

2008 թ-ի մայիսի 27-ից մինչև 2009 թ-ի փետրվարի 18-ն ընկած ժամանակահատվածում ՀՀ ԿԱ ՀՊԾ եկամուտների հաշվառման, պլանավորման և վերլուծության վարչության, հարկային վարչարարության կատարելագործման վարչության, օպերատիվ հետախուզության վարչության կողմից ՀՀ գյուղատնտեսության նախարարությունում իրականացվել է պետական տուրքի վճարման (գանձման) աշխատանքների ճշտության ստուգում, որի արդյունքում 18.02.2009 թ-ին կազմված թիվ 1040552 ակտով պետական տուրքի գծով արձանագրվել են խախտումներ: Մասնավորապես, ՀՀ գյուղատնտեսության նախարարության լիցենզավորման վարչության կողմից սխալ են կիրառվել «Պետական տուրքի մասին» ՀՀ օրենքի 19-րդ հոդվածով սահմանված համապատասխան լիցենզիա տալու համար պետական տուրքի դրույքաչափերը (50.000 դրամ դրույքաչափի փոխարեն կիրառվել է 25.000 դրամ դրույքաչափ): Այդ խախտումների համար վերագրյալ ակտով առաջադրվել է պետական բյուջե լրացուցիչ վճարման ենթակա պետական տուրքի գումար ընդամենը 1.053.750 դրամ, այդ թվում՝ պետական տուրք 528.500 դրամ և տույժ՝ 525.250 դրամ:



Ստուգման ընթացքում ՀՀ գյուղատնտեսության նախարարության ձեռնարկած միջոցառումների արդյունքում լիցենզիա ստացած համապատասխան անձինք (թվով 17 կազմակերպություններ) կատարել են անհրաժեշտ վճարումները (պակաս վճարված պետական տուրքի գումար՝ 425.000 դրամ և ուշացած օրերի տույժ՝ 27.125 դրամ)՝ գումարները փոխանցելով ՀՀ պետական բյուջեի պետական տուրքի 900005162822 հաշվեհամարին: Ուշացված օրերի համար հաշվարկված 498125 դրամի տույժը 02.07.2008 թ-ին մարվել է ՀՀ գյուղատնտեսության նախարարության անասնաբուժասանիտարական փորձաքննության և անասնաբուժության բնագավառում օգտագործվող անասնաբուժական դեղամիջոցների կենսապատրաստուկների արտադրության լիցենզավորման հանձնաժողովի նախագահի կողմից: ՀՀ պետական բյուջեի պետական տուրքի 900005163341 և 900013202016 հաշվեհամարներին 20.02.2009 թ-ին փոխանցվել է համապատասխանաբար 93.100 դրամ և 10.400 դրամ, որոնք որ գանձվել են պետական տուրքի կանխիկ գանձման պակասորդ անդորրագրերի համար:

Թվով 12 տնտեսվարող սուբյեկտների կողմից, դրանք են՝ «Անասնապահական մթերքի փորձաքննության կենտրոն» ՍՊԸ, «Հանրապետական անասնաբուժական հակահամաճարակային և ախտորոշիչ կենտրոն» ՊՈԱԿ, «Դոսի» ՍՊԸ, «Անի թագ» ՍՊԸ, «Գաբրի Հենվեր» ՍՊԸ, «Վարդգես Վահագն» ՍՊԸ, «Վայք վետերինար» ՍՊԸ, «Ասպարամ» ՍՊԸ, «Կենդանական ծագման մթերքի փորձաքննության կենտրոն» ՍՊԸ, «Հակահամաճարակային արշավախումբ» ՍՊԸ, «Սեկարդ» ՍՊԸ, «ՀՀ առողջապահության նախարարության պետական հիգիենիկ և հակահամաճարակային տեսչության Կոտայքի մարզային փորձագիտական կենտրոն» ՊՈԱԿ, կատարված վճարումները հաշվառված են և արտացոլված են համապատասխան սուբյեկտների պետական տուրքի անձնական հաշվի քարտերում, ինչի արդյունքում վճարման պահին պետական տուրքի ԱՀԲ-ներում առաջացել են գերավճարներ: Իսկ թվով 5 տնտեսվարող սուբյեկտների, դրանք են՝ «Բիոլան» ՍՊԸ, «Սարո Մոսի» ՍՊԸ, «Վետ-Լին-Ֆարմ» ՍՊԸ, «Ղալա» ՍՊԸ, «Ջուլարթ» ՍՊԸ, կողմից կատարված վճարումները, ինչպես նաև ՀՀ գյուղատնտեսության նախարարության անասնաբուժասանիտարական փորձաքննության և անասնաբուժության բնագավառում օգտագործվող անասնաբուժական դեղամիջոցների՝ կենսապատրաստուկների արտադրության լիցենզավորման հանձնաժողովի նախագահի կողմից կատարված վճարումներն արտացոլված չեն Հարկատու 3 տեղեկատվական բազայում, սակայն «Հայաստանի Հանրապետության գյուղատնտեսության նախարարության աշխատակազմ»-ը ներկայացրել է այդ վճարումների մեմորիալ օրդերները, որոնք առկա են սույն գործում և ուսումնասիրվել են Հանձնաժողովի կողմից:

Տնտեսվարող սուբյեկտներից 3-ը, դրանք են՝ «Անասնապահական մթերքի փորձաքննության կենտրոն» ՍՊԸ /ՀՎՀՀ 02576383/, «Կենդանական ծագման մթերքի փորձաքննության կենտրոն» ՍՊԸ /ՀՎՀՀ 02581744/, «Հակահամաճարակային արշավախումբ» ՍՊԸ /ՀՎՀՀ 02573651/) հաշվառված են ՀՀ ՖՆ Կենտրոնի ՀՏ-ում:

Հարկ է նշել նաև, որ մեմորիալ օրդերներում որպես վճարման նպատակ նշված է լիցենզիայի համար հերթական պետական տուրքի համար պակաս վճարված գումար և լիցենզիայի պակաս վճարված պետական տուրքի համար հաշվարկված տույժ, այսինքն՝ կատարված վճարումները, ըստ էության, չեն վերաբերում ստուգման ակտին:

Քննարկվող դեպքում գործ ունենք մի իրավիճակի հետ, երբ 18.02.2009 թ-ի թիվ 1040552 ակտով առաջադրված պարտավորությունների մի մասը վճարվել է վերոգրյալ թվով 17 կազմակերպությունների կողմից, որի հետևանքով այդ կազմակերպությունների պետական տուրքի անձնական հաշվի քարտերում վճարման պահի դրությամբ առաջացել են գերավճարներ:

Հանձնաժողովը գտնում է, որ նշված գերավճարի գումարները «Հայաստանի Հանրապետության գյուղատնտեսության նախարարության աշխատակազմ»-ի պետական տուրքի գծով առկա պարտավորություններից հաշվեգրելու համար ՀՀ ՖՆ Տեղեկատվական

տեխնոլոգիաների ենթակառուցվածքների ներդրման և զարգացման վարչության, Կենտրոնի ՀՏ-ի, «Հայաստանի Հանրապետության գյուղատնտեսության նախարարության աշխատակազմ»-ի համապատասխան պաշտոնատար անձանց անհրաժեշտ է համատեղ ուսումնասիրել վերոգրյալ կազմակերպությունների պետական տուրքի անձնական հաշվի քարտերը, վճարման համապատասխան անդորրագրերը և կատարել «Հայաստանի Հանրապետության գյուղատնտեսության նախարարության աշխատակազմ»-ի պետական տուրքի գծով պարտավորությունների վերահաշվարկ:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

### **ո Ր Ո Շ Ո Ւ Մ Է՝**

1. Չեղյալ համարել ՀՀ ՖՆ իրավաբանական վարչության պետի 21.08.2015 թ-ի թիվ 79 որոշումը:

2. ՀՀ ՖՆ Տեղեկատվական տեխնոլոգիաների ենթակառուցվածքների ներդրման և զարգացման վարչությանը, Կենտրոնի ՀՏ-ին կատարել «Հայաստանի Հանրապետության գյուղատնտեսության նախարարության աշխատակազմ»-ի պետական տուրքի գծով պարտավորությունների վերահաշվարկ:

**Հանձնաժողովի նախագահ՝**

  
**Վ.ՄԻՐՈՒՄՅԱՆ**  
